



**SITI SUHAILAH SHAHRUDDIN (tengah), Nurul Afifah Adila Mohd. Salleh (kanan) dan Irfan Mohd. Fairus bersama piala masing-masing dalam Pertandingan Pidato Dakwah Bella Islam Piala Menteri di Jabatan Perdana Menteri 2015 di Arau, Perlis, semalam.**

## Bajet 2016 penuh maqasid syariah

**ARAU 25 Okt.** - Pembentangan Bajet 2016 oleh Perdana Menteri, Datuk Seri Najib Tun Razak pada Jumaat lalu memenuhi keperluan maqasid syariah dalam memelihara agama dalam bidang ekonomi serta pembentukan jiwa dan akal masyarakat.

Ketua Pengarah Jabatan Kemaajuan Islam Malaysia (Jakim), Datuk Othman Mustapha sehubungan itu menyifatkan bajet berkenaan sebagai menyeluruh dan memenuhi kehendak dan tuntutan agama Islam.

"Dalam keadaan ekonomi mencabar, Perdana Menteri membentangkan bajet untuk segenap lapisan masyarakat daripada semua aspek secara wasatiyyah (bersederhana).

"Ini merangkumi agama, pembentukan jiwa dan akal menerusi pendidikan, keturunan dan harta (ekonomi)," katanya dalam sidang akhbar selepas penutupan Pertandingan Pidato Dakwah Bella Islam Piala Menteri di Jabatan Perdana Menteri 2015 bermula 23 Oktober hingga hari ini di kampus tetap Universiti Malaysia Perlis

(Unimap) di Pauh Putra, di sini hari ini.

Dalam pada itu, Othman memberitahu, Jakim akan terus memberi peringatan kepada seluruh umat Islam supaya tidak terlalu ghairah menyampaikan berita yang mereka peroleh menerusi media sosial termasuk khutbah.

Terdahulu, ketika berucap, beliau menarik perhatian bagaimana kes seorang imam Masjid Negara yang ditampar seorang lelaki warga asing baru-baru ini kerana mengalami gangguan mental.

"Namun hanya dalam beberapa jam, pelbagai berita tidak benar disebarkan termasuklah mendakwa lelaki warga asing itu berfahaman syiah," katanya.

Dalam pertandingan itu, pelajar Universiti Sains Islam Malaysia (USIM), Siti Suhailah Shahrudin, 22, diumumkan sebagai juara de-



**OTHMAN MUSTAPHA**

ngan menewaskan Nurul Afifah Adila Mohd. Salleh (Universiti Putra Malaysia) dan Irfan Mohd. Fairus (USIM).

Siti Suhailah ketika ditemui memberitahu, ibunya, Siti Fatimah Yusof yang bekerja sebagai juruteknik di Radio Televisyen Malaysia (RTM), Kuantan, Pahang, banyak membantunya membina keyakinan diri untuk menjadi pemedato yang baik.

Dia yang meminati pidato dan pernah memasuki beberapa pertandingan seumpamanya ketika sekolah menengah, tidak menolak kemungkinan untuk mengembangkan bakatnya dengan memasuki program realiti pada masa hadapan.

"Jika diberi peluang, saya ingin mencuba pertandingan realiti di dalam televisyen pula," katanya yang memenangi RM3,000 dan piala pusingan.